

ITALIANIAN

Jullu 2023



Mensajen hosi Lucio Savio, Jestor
projetu Finansiamentu klimátika

Pajina 2

Haree Oxfam iha Timor-Leste nia
Relatoriu Peskiza

Pajina 4



OXFAM

Oxfam iha Timor-Leste nia Servisu ba Justisa Klimátika

Lucio Savio

Jestor Programa Finansiamentu Klimátika, Oxfam in Timor-Leste

Olá sani nain sira!

Ba edisaun ida ne'e hau hakarak fahe ho ita boot sira kona-ba Oxfam iha Timor-Leste (OiTL) nia servisu iha pillar Justisa Klimátika. OiTL nia artikulasun Justisa Klimátika mak Adapta no Haforsa Reziliénsia ba alterasaun klimátika: ita halo advokasia ba alokasaun finansa klimátika iha nivel internasionál no Nasionál, hodi asegura katak finansiamentu klimátika mak iha alokasaun nato'on ba adaptasaun no sei benefisia ba comunidade sira, partikularmente ba feto sira no grupu marjinalizadu ne'ebé hetan impaktu maka'as hosi krize klimátika, no mos haforsa reziliénsia nivel comunidade nian ba dezastre, asaun umanitária no krize klimátika.

Ita hotu hatene no infrenta hela, dadauk ne'e mundu manas ba dadauk, udan la tun tuir nia tempu ona, tasi ben sai dadauk mai rai maran, rai halai, mota tun, anin boot no kalamidade seluk, ne'ebe akontese tanba afeta husi mudansa klimátika.

Tuir Intergovernmental Panel on Climate Change (IPCC), dadauk ne'e rai nia manas sai to'o ona 1.1 C no tuir akordu Paris nian hateten katak mundu nia manas labele sa'e to 1.5 C, tanba bele afeta ba be maran, ema moras aumenta, ema mate tanba hahan laiha, ekosistema mundu nia sei mohu no tasi be'en bele sa'e hodi okupa rai maran, hanesan iha nasaun Salomon ne'ebe iha illa kiik balu lakon ona. Hosi fenomena hirak ne'e, OiTL nia intervensaun sira iha nivel global mak husu ba nasaun dezentolvidu sira tenke hahu ona halo tranzisaun ba enérjia alternativa sira ka enérjia sira ne'ebe la mai hosi fosil fuel nune'e la kontinua aumenta rai nia manas, nune'e OiTL husu ba nasaun dezentolvidu sira atu rekompensa sira nia aktu liu husi finansiamentu klimátika

Mai ita hotu hola asaun iha rai laran hodi adapta ba mudansa klimátika no haforsa ita nia lian iha nivel internasionál hodi husu nasaun bo'ot dezentolvidu sira atu la'os deit rekompensa ba impkatu hosi mudansa klimátika, maibé sira mos tenke hola asaun mitigasaun iha sira nia rai laran hodi mundu bele to'o net zero carbon ne'ebe iha akordu Paris hateten emisaun tenke trava, no la bele to'o 1.5 C.





HAREE OITL NIA RELATÓRIU PESKIZA

Iha tinan 2023 nia laran, Oxfam iha Timor-Leste lansa relatóriu oin-oin ne'ebe foka ba asuntu la hanesan. Husi hirak ne'e, iha Relatóriu konaba Joven sira nia Papél iha diversifikasaun Ekonomia: Joven nia persepsaun no prioridade sira ba Partidu Politiku iha eleisaun parlamementar 2023 liga ba Diversifikasaun Ekonomia no daruak mak Komunitade nia Esperénsia kona-ba Mudansa Klimátika nia impaktu iha Timor-Leste

Mai ita vizita Relatóriu konaba Komunitade nia esperiensa ba Mudansa klimatika nia impaktu iha Timor-Leste ne'ebe hatudu faktu oinsa Komunitade sira iha Timor-Leste sofre



ona hosi impaktu negativu ba mudansa klimátika, maski sira la'ós kontribuinte prinsipál ba emisaun kabornu globál nian. Eventu klimátika ne'ebé akontese bebeik inklui udan ho intensidade a'as, udan ne'ebé la regular, bailoron naruk no udan-anin boot, hanesan siklone tropikál Seroja iha 2021.



Enkuantu relatóriu seluk mak kona-ba Joven sira nia Papél iha diversifikasaun ekonomia: foka ba Joven sira nia Persepsaun no Prioridade sira ba Partidu Polítiku Iha Eleisaun Parlamentár 2023 liga ba Diversifikasaun Ekonomia

iha Relatóriu Peskiza ne'e, Joven sira iha persepsaun oin-oin kona-ba programa sira ne'ebé durante ne'e Governu implementa ona hodi hasa'e

no mantein joven sira nia partisipasaun iha área ekonomia. Iha parte pozitivu nian, joven sira hanoin katak durante ne'e Governu hatudu ona nia interese hodi suporta joven sira liu husi programa oi-oin ne'ebé tarjetu ba joven sira, liu-liu suporta ba grupu joven sira ne'ebé involve ona iha atividade ekonomia nian. Enkuantu, joven rasik presiza aumenta no investe mos iha kapasidade no konesimentu hodi bele sustentabiliza sira nia inisiativu rasik.

Hetan Relatoriu hirak ne'e, no relatoriu resente sira seluk, liu hosi link/QR Code :

<https://oxfam.box.com/s/2fv5fj8f4yf9dlc0ymbc2kyibdvvz48h>







Refleta, mudansa no forte liu tan

Reflesaun mak momentu oportunu ida hodi hasoru malu ho parseiru no ema hirak ne'ebe sai xave ba projetu ida nia susesu. Hanesan Programa sira ne'ebe finansia hosi Governu Nova-Zelandia, KōTUI, konsege lori partisipante hosi nasaun illa pasifiku mai Timor-Leste hodi selebra susesu no reforsa servisu hamutuk iha futuru

Iha fulan Marsu liu bá, ami orgullu hodi akomoda família bo'ot Oxfam no parseiru sira hosi illa pasífiku hanesan Papua Nova-Guiné, Illa Samlomaun, Tuvalu, no Nova-Zelândia hamutuk ho ekipa Timor-Leste iha Reflesaun programa Kōtui hodi aprende no halo planu hamutuk.

Kōtui (lian Māori, signifika kesi hamutuk ka homan ou soru-reprezenta diálogu no servisu hamutuk entre nasaun sira iha pasífiku no mos Timor-Leste). Programa Kōtui implementa ona ba tinan datolu, no sei kompleta iha tinan dalima iha nasaun pasífiku 3 no Timor-Leste, ne'ebe finansiadu hosi Governu Nova-Zelândia liu hosi parseria ho Oxfam Aotearoa, hodi foku ba hasa'e rezilénsia, moris-diak no partisipasaun feto

no grupu vulnerável sira iha dezafiu Kolapsu Klimátika, dezastre inklui empodera maluk feto no grupu vulneravel sira nia asesu ba rekurusu sira.

Reflesaun Projetu Kōtui 'Te KETE ò KōTUI' ba dala 3 iha Timor-Leste produtivu tebes ho diskusaun sira, dezeña no projetu servisu ba tinan oin. Hafoin diskusan, iha mos interkambiu kultural ba partisipante sira ba vizita fatin istoriku balun iha Dili, eventu lokal no mos apresentasaun kultural iha sentru Oxfam. Parseiru sira hosi Timor-Leste ne'ebe hola parte iha reflesaun ne'e mak, Rede ba Rai, Jurista Advokasia (JA), Asosiasaun Chega ba Ita (ACbit). Alumni Parlamentu Foinsa'e, Core Group Transparency (CGT), no FOKUPERS



Feto no asaun klimátika

Asaun klimatika la rekere pozisaun no poder, Elisa lori mudansa ne'ebe signifikante ba nia comunidade, organizasaun no planeta ne'ebe ita hela liu hosi nia dedikasaun no papel Timo-Verde iha projetu Rai Matak ne'ebe implementa iha munisipiu Baucau

Iha Timor-Leste nia luta ba ambiente ne'ebe moos, saudável no matak, iha comunidade sira ne'ebe ho iniciativa rasik no matenek lokál ne'ebe kontribui ba sira nia ambiente rasik ne'ebe sustentável.

Loron 5 fulan Juñu mak loron ne'ebe dedikadu ba Ambiente. Tema ba loron mundial Ambiente ba tinan 2023 nia mak **#HalakonPlastiku**. Iha Baucau, Selebrasaun loron mundial ambiente espesial tebes ho lansamentu Projetu Rai Matak iha suku Triloka, postu-administrativu Baucau Villa, Munisipiu Baucau. Mana Elisa nu'udar Diretora Timor-Verde iha Baucau deskreve ninia paixaun ba ambiente ne'ebe matak iha Timor-Leste liu hosi Timor-Verde nia servisu oin-oin durante ne'e, hahu hosi conserva ai-parapa to'o iha

to'os carbonu no agro-floresta ne'ebe nu'udar parte iha projetu Rai Matak.

Ho konseitu ne'ebe uniku, Timor-Verde promove ai-horis sira nia valor iha selebrasaun ne'e rasik, no fahe mensajen kona-ba importansia hosi reflorestasaun, rendimentu ne'ebe sustentavel, harii empresa liu hosi agrofloresta, no empodera lideransa lokal entre comunidade nia iniciativa sira.

Hamutuk iha selebrasaun furak ida ne'e, iha toos nain hosi suku Triloka, comunidade, estudante no bainaka sira hosi parte Governu no doador, ne'ebe konklui ho atividade kuda ai hamutuk iha toos laran, han ai-han lokál ne'ebé saborozu.

Foinsa'e nia dedikasaun

Lucio Savio

Jestor Programa Finansiamentu Klimatiku

Joven nia lideransa lori Alumni Parlamentu Foinsa'e (APFTL) ba tranformasaun nu'udar organizasaun ne'ebe ho komitmentu atu servi comunidade no joven seluk, liu hosi implementa projetu no harii parseria oin-oin inklui kolaborasaun ho Oxfam iha Timor-Leste.

Parlamentu Foinsa'e hanesan atividade edukasionál ne'ebe fo oportunidade ba foinsa'e sira hodi koñese no esperensia nu'udar representante povu no lori povu nia lian ba nivel aas hanesan Parlmentu Nasional.

APFTL harii hosi joven 65 hosi postu-administrativu hotu-hotu iha Timor-Leste wainhira remata mandatu iha tinan 2012. Nu'udar organizasaun ne'ebe mai ho vizaun, 'Joven nu'udar autores ba dezvoltamentu Sustentável, nu'udar síviku, solidáriu no orgullu nu'udar Timorensen' oras ne'e dadaun, APFTL ativu hodi halo engajamentu ho grupu foinsa'e seluk iha setór produtivu no mos kriativu. Ho Oxfam iha Timor-Leste APFTL Kolabora hodi implementa programa finansiamentu klimatika ne'ebe finansiadu hosi Governu Nova-Zelândia. ida ne'e la'os esperensia foun ba APFTL hodi kolabora ho OiTL.

Hamutuk ho projetu Kōtui ba finansiamentu klimatika, APFTL iha papel hodi monitoriza lala'ok fundu klimatika, inklui nia relatoriu sira, mobiliza joven sira hodi partisipa ativu iha prosesu foti desizaun hotu, iha ámbitu mundansa klimatika ka finansiamentu klimatika iha teritorio nasional.



Ross Merry da Gloria/Oxfam iha Timor-Leste



Be'e nia importánsia ba comunidade

ISTORIA HOSI MEDIA TOUR FOKU BA KONSERVASAUN BEE MATAN NE'EBE FÓ VANTAJEN BA FETO NO GRUPO VULNERAVEL

Be'e nu'udar nesesidade báziku ne'ebé importante ba ema hotu hodi responde ba nesesidade lor-loron, inklui mos ba agrikultór sira hodi halo produsaun ai-han sira. Nune'e, Be'e debu nu'udar solusaun ida ne'ebe implementa iha José Tacaqui nia aldeia Lakufo'an hodi hakotu dezafiu ne'ebe durante ne'e comunidade sira hasoru

Komunidade sira iha aldeia Lakufo'an antes ne'e sempre utiliza udan been hodi halo atividade agrikultura hanesan kuda kafé, sabraka, ai-nanas, abakate, bua no malus hodi fa'an fali iha merkadu.

'Nu'udar xefi aldeia hau rekoñese problema be'e moos iha aldeia ne'e, tanba tinan barak comunidade konserva duni udan been iha uma tatis hodi uza ba nesesidade, maibé daudaun ne'e iha ona bee matan tolu ne'ebé bele sustenta comunidade nia moris'

Organizasaun Permakultura Timor-Leste PERMATIL hahú halo estudu no servisu hamutuk ho comunidade sira iha área refere, hodi buka solusaun hamutuk oinsá ajuda comunidade sira ne'e sai resiliente liu bainhira la iha udan been. Liu husi dalan Konservasaun Bee ne'ebé implementa husi (PERMATIL), fó duni solusaun ne'ebé di'ak ba comunidade sira, liu-liu grupu vulnerável sira,

José no Komunidade sira iha Aldeia Lakufo'an kontinua husu apoiu tékniku husi PERMATIL, nune'e tempu udan bele oferece bee barak liu tan ba tempu oin mai.



Jose Tacaqui, xefi aldeia Lakufo'an, RAE0A
Racom Maubisse I AJTL

Solusaun hosi matenek lokál

ISTORIA HOSI MEDIA TOUR FOKU BA KONSERVASAUN BEE MATAN NE'EBE FÓ VANTAJEN BA FETO NO GRUPO VULNERAVEL

Hosi aldeia Lakufo'an, Rosina Oki mos fahe nia esperiênsia uza bee debu ne'ebe comunidade sira halo ho apoiu hosi PERMATIL hodi hamenus dependensia aas ba udan been wainhira monu rai



Rosina Oki. iha entrevista ho AJTL
Racom Maubisse | AJTL

Konservasaun bee hanesan metodu ida ne'ebe uza matenek lokal hodi solusiona dezafiu ba comunidade sira ne'ebe moris ho bee menus iha sira nia hela fatin.

Rosina Oki esperensia ona menus bee tanba distânsia hosi nia hela fatin no bee moos ne'ebe dook, nune'e obriga Rosina no familia konsumu no utiliza bee udan hodi hatan ba nia nesesidade.

"Ami iha tempu udan ne'e sente kontente bele prezerva udan monu rai iha uma tatis tau mangeira, enxe ba tanke hodi uza ba nesesidade konsumu no fase ropa iha tempu, maibé tempu bai-loron ne'e hanesan dezafiu mai ami", dehan Rosina

Komunidade sira iha Aldeia Lakufo'an pratika halo konservasaun bee ho apoiu hosi organizasaun PERMATIL ne'ebe fo assistensia tekniku, nune'e bee ne'ebe conserva bele moris ba tempu naruk ba sira nia atividade uma laran, to'os no nesesidade sira seluk.

Rosina espera matenek ne'ebe sira hetan no pratika ne'ebe halo ona hamutuk ho comunidade sira, bele kontinua no hatutan ba jerasasun foun sira, atu kuidadu liu tan rai no ai-horis ne'ebe ita hela, nune'e bele nafatin fo moris fali mai ita ho tempu klima ne'ebe sempre muda iha kada tinan.

Ema ho defisiénsia no direitu dijital

Zevonia Vieira

Prezidente Asosiasaun Jornalista Timor-Leste

Ita hatene saida mak Direitu Dijital ka Digital Right?

Direitu Dijital hanesan direitu umanus no direitu ba justisa, ne'ebé fó possibilidade ba ema hotu atu asesu, uza, halo no publika iha média dijital ka asesu no uza komputadór, sasán eletrónica seluk ho rede telekomunikasaun

Savi husi Direitu Dijital mak:

- Direitu asesu no uza komputadór no ka eletrónica devices seluk
- Direitu hodi asesu no uza digital content ka Konteúdu Dijital
- Direitu hodi kria no partilla média dijital
- Direitu ba privasidade iha comunidade dijital
- Direitu hodi espresa o nia direitu no opiniaun ne'ebe livre
- Direitu hodi relata ema ida ka saida de'it mak inapropriado (Ia serve), ezemplu: Bullying (Goza no hatun ema seluk), hate speech (Liafuan ódiu), online sexual harassment (Asedu seksual Online), dezinformasaun no mallinformasaun.
- Lei sibernétiku sira ne'ebe bele proteje ema hotu nia direitu, seguru no livre hodi asesu plataforma dijital

Iha fulan Fevereiru liu ba, Oxfam iha Timor-Leste organiza treinamentu ba Maluk ho Difisiénsia sira konaba Direitu Dijital hodi koñese, oinsá bele asegura sira nia an, hato'o sira nia direitu, nu'udar ne'e parte ida hodi husi direitu umanus, tanba impaktu negativu hosi utilizasaun dijital rasik bele afeta liberdade espresaun ema ida-idak nia. Iha treinamentu ne'e hetan partisipasaun mos husi Rádio Komunitade



Defisiénsia (RKDTL) ne'ebe jere rasik hosi ema ho defisiénsia sira. Iha mos maluk ho difisiénsia sira, ne'ebe entuziasmu tebes hodi partisipa no halo prátika iha sesaun hotu.

Ikus mai, treinamentu ne'e sei sai importante tebes hodi halo advokasia no kampaña ba direitu Ema ho difisiénsia liga ho direitu dijital, no mos oinsa politiku nain sira bele buka solusaun ne'ebe justu no la diskrimina ema hotu inklui ema ho defisiénsia.

Treinamentu ne'e partisipa husi Ra'es Hadomi Timor Oan (RHTO), Asosiasaun Defisiensia Timor-Leste (ADTL) no Core Group Transparency (CGT)

VIDIO MUZIKA 'LABELE HUSIK EMA IDA HELA IHA KOTUK'

LABELE HUSIK EMA IDA HELA IHA KOTUK LETRAS: IZU PEREIRA

Labele Husik Hau Lakon Esperanca
Rona Hau Lian, Hatan Mai Hau Lian
Hau Iha Kapasidade Hodi Hetan Oportunidade
Direito Ba Moris, Direito Ba Edukasaun,
Hetan Direito Hanesan Nudar Sidadaun

Fo Fatin Mai Hau Atu Inklui, Hatu'ur Direito Iha Desizaun Ne'ebe Inkluziva
Hau Laos Mukit Laos Mos Fraku! Maibe Hau Uniku No Forsa Ida Ba Nasaun Nee
Hamutuk Ho Hau, Hateke Hau Fuan Hodi Hamoris Esperanca
Labele Husik Hau Mesak Hela Iha Kotuk

**LABELE HUSIK EMA IDA HELA IHA KOTUK
TEMPO ONA RONA HAU LIAN,
LABELE HUSIK EMA IDA HELA IHA KOTUK
HAU LIAN BOLU O, HAU UKUN NAIN!
LABELE HUSIK EMA IDA HELA IHA KOTUK
HATUR HAU (NIA) PRESIZA (LO)LOOS, HAU UKUN NAIN!**

REFRAUN

Labele Husik Ema Ida Hela Iha Kotuk, Labele Husik Ema Ida Hela Iha Kotuk
Labele Husik Ema Ida Hela Iha Kotuk, Tempo Ona Rona Hau Lian,
Labele Husik Ema Ida Hela Iha Kotuk, Hau Lian Bolu O, Hau Ukun Nain!
Labele Husik Ema Ida Hela Iha Kotuk,
Hatur Hau (Nia) Presiza Loos, Hau Ukun Nain!
Labele Husik Ema Ida Hela Iha Kotuk
Hasai Silensio Nebe Suku Metin Hau Nia Fuan
Labele Husik Ema Ida Hela Iha Kotuk



Rai osan ba mudansa uma-kain

Joana Maria da Graca

Ofisial Programa Justisa Jeneru, Oxfam iha Timor-Leste

Esperensia dahuluk hodi envolve-an iha grupu hamutuk ho comunidade seluk, la sai hanesan bareira ba Jacinta hodi hola parte no sai nu'udar lider iha grupu ida. Jacinta mos hetan apoiu tomak hosi nia kaben, iha ne'ebe sira nain-rua hamutuk halo mudansa ba sira nia uma-kain.

Programa Rai Osan ba Mudansa (ROMANSA) iha Oe-cusse, lidera hosi Oxfam nia parseiru xave sira hanesan MANEO, BIFANO, AFFOS no mos RHTO, lori Jacinta hatene kona-ba sistema rai osan no fahe papel iha familia laran, ne'ebe nia hare, fo benefisiu ba nia aan, nia uma-kain no comunidade ne'ebe nia hela ba.

“Hau lidera hau nia grupu ROMANSA iha ami nia comunidade Oe-Nunu ho total membru 19, ne'ebe kompostu hosi feto nain 14 no mane nain 5. Kada semana ami hasoru malu no hala'o atividade rai osan. Nu'udar Lider, hau asegura katak laiha problema iha grupu laran, ema hotu fiar malu”. dehan Jacinta

Alende ROMANSA, Jacinta nia kaben Tomás mos hola parte iha Sistema Aprendizajen Asaun Jeneru ka GALS hahu tinan 2022. “Iha GALS, ha'u hare Ai-Hun Balansu interesante tebes hodi aprende no mos Jornada Ba Vizaun. Tanba iha Ai-Hun Balansu ami hare kona-ba fahe servisu uma-laran; feto no mane servisu hamutuk. Hau kontenti tebes ho ami nia familia ne'ebe suporta malu, hanesan tein, ta'u matan ba labarik sira nune'e ami ida-idak bele partisipa iha enkontru sira. GALS no ROMANSA di'ak hotu tanba bele suporta familia nia moris di'ak, muda bahalok no rai osan ba ami-nia futuru” dehan Jacinta





Papel média iha inkluziun sosiál

Cris Caetano

Jestor ba Programa Reziliensia, Oxfam iha Timor-Leste

Dada-lia Rádio kona-ba oinsa Preparasaun no Prontu ba dezastre dedika ba Ema ho Defisiénsia lori perspetiva inkluziun ne'ebe sei kria dalan ba preparasaun no mitigasaun ba dezastre ne'ebe inkluzivu, seguru no la husik ema ida kotuk.

Iha fulan Abril liu ba, Oxfam iha Timor-Leste ho kontente simu Exelénsia Sekretáriu Estadu ba Komunikaun Sosiál, Merício Juvenal dos Reis "Akara Provedór Direitus Umanus, Virgílio da Silva Guterres, Presidente Autoridade Protesaun Sivil, Ismael da Costa Babo, Presidente Konsellu Imprensa Timor-Leste, Otélio Ote, Sekretária Embaixadór Austrália iha Timor-Leste, Jaqueline Herbert no Representante Australian Broadcasting Corporation (ABC)-International Development, Aaron Kerney hodi mai iha Sentru Rekursu Oxfam iha Dili, Timor-Leste



Hamutuk ho ekipa husi **#RádioLiberdade** representante husi média sira no Organizaun Ema ho Defisiénsia, ami bele halo lansamentu ba séries 10 husi Radio Talk Show kona ba **#Preparasaunbadezastre** no **#prontubadezastre** ne'ebé hala'o espesifikamente ba Ema ho Defisiénsia matan. **#Emahodefisiénsia** hola parte iha grupu ne'ebé vulnerável liu ba impaktu husi **#mudansaklimatika** no durante dezastre. Asegura sira nia partisipasaun iha produsaun informasaun ne'ebé sensível no mensajen sira kona ba pronto ba dezastre, no mos fahe mesajen tuir tempu mak esensiál liu hodi la tau ema ida iha kotuk.

Séries Rádio Talk Show ne'e prodúz husi **#RádioLiberdade** ne'ebé hetan suporta tékniku husi Australia nian **#ABC-International Development**. Séries sira ne'e modera husi **#emahodefisiénsia** rasik – sei tatoli liu husi Rádio Liberdade no versaun gravasaun sei distribui ba rádio comunidade sira iha Timor-Leste nia laran hodi anunsia. Servisu sira ne'e hala'o hanesan parte husi projetu pronto ba dezastre ne'ebé finansia hosi Governu Australia. Ho Oxfam nia mehi ba comunidade vulnerável iha Timor-Leste (liu-liu feto, labarik feto, ema ho defisiénsia no sira seluk) iha ona preparasaun di'ak hodi hasoru dezastre no reziliente ba impaktu negativu husi mudansa klimátika.

#PromoveRadiolInkluzivu #InformasaunInkluzivuBaEmaHoDefisiénsia #MesajenRespondeDezastreInkluzivu

Ofisial Programa Prontu ba Dezastre

Hanesan mos Domingos no k munidade iha aldeia Oeneno, suku Bobometo, iha Rejiaun Espesi al Oecusse, ne'ebe servisu ona ba sira nia Planu Asaun Komunidade ne'ebe mos integra ho atividade Rai Osan ba Mudansa (ROMANSA)



"Iha Planu Asaun Komunitade ka #PAK ami servisu hamutuk hodi identifika problema ne'ebe mak tenki hatan lalais, no halo asaun hodi prevene risku dezastre, hamutuk ho grupu ROMANSA ne'ebe kompostu mos hosi feto, mane no ema ho defisiensia sira ne'ebe envolve

Iha Planu Asaun komunidadé, membru sira identifika fatin risiko ba dezastre naturais no fatin ne'ebe seguru wainhira dezastre mosu, hanesan inundasaun no rai halai. Alende ne'e, komunidadé sira mos sei servisu hamutuk hodi identifika rekursu saida mak aldeia no suku ne'e iha. Rekursu natural sira ne'ebe komunidadé sira identifika, sei sai poténsia ba suku no aldeia rasik hodi jere no uza ba vida ekonomia loron-loron, nune'e la'os deit reziliente, maibe komunidadé sira mos sei hala'o moris ne'ebe sustentável liu ho rekursu ne'ebe iha.



Prátika no selebra susesu iha loron feto mundiál

Carlos Correia

Ofisial Programa Rai Matak

Hodi selebra loron mundiál Feto, to'os nain no ekipa servisu Rai Matak, hosi to'os nain sira, Oxfam iha Timor-Leste, Fundasaun #HoMusanIda no parseiru implementador; Centro Comunidade Covalima, Timor-Verde, NETIL no Fundasaun Rai Matak rasik pasa tempu produtivu hamutuk hodi aprende kona-ba ida-idak nia esperensia lideransa, istória pessoal no prátika prosesamentu ai-haan hamutuk ho Corner Store Network Timor-Leste iha Metinaru.

Selebrasaun ida ne'e mos aprovieta hodi fo apresiasaun ba servisu diak hosi to'os nain no ekipa feto sira ne'ebe hala'o servisu furak ba implementasaun projetu Rai Matak durante tinan 3 nia laran iha munisipiu Baucau, Covalima, Lautem no Likisa.

Hamutuk ho The Corner Store Network Timor-Leste, ekipa feto no mane hosi Projetu Rai Matak aprende hamutuk kona-ba prosesamentu ai-haan lokal ne'ebe Corner Store hala'o, hanesan tomate salga, ai-nanas salga, produsaun xa lokal sira hosi marungi, kinur, ortelaun, du'ut morin no seluk tan. iha sorumutu ne'e mos nakonu ho ai-haan no hemu lokal sira ne'ebe mai hosi to'os nain sira ne'ebe kolabora ho Corner Store Network.

Parabens ba Feto hotu-hotu iha Timor-Leste, no Parabens Rai Matak!



Parseiru projetu Rai Matak iha selebrasaun Loron Mundiál Feto. Kompletu treinamentu halo prosesamentu ba ai-haan ho Corner Store Network

OiTL hola parte iha KOPA FONGTIL 2023

Hodi haforsa parseria no hola parte iha inisiativu parseiru sira nia, Oxfam iha Timor-Leste nia ekipa Feto no Mane haram kopa #FONGTIL2023 ho tema “Hamutuk ita hametin no haburas parseiru diak, kria amizade saudavel liu hosi atividade desportivu”

Ekipa futsal Feto no Mane foin lalais ne’e marka prezensa iha abertura FONGTIL cup ne’ebe halibur Organizasaun Sociedade Sivil nasional no internasional lubun ida nune’e haforsa parseria ne’ebe saudavel hafoin remata tempu servisu ne’ebe todan no konsumu enerjia barak.

Treinador Ekipa rua, maun Jorge Moniz hateten, eventu ida nee furak tebes atu kria amizade ho Organisaun sira seluk. “Dala ruma ita rona deit Organizasaun nia naran maibe la koñese ema sira iha Organizasaun ne’e. No obstakulu ne’ebe hau hare mak dalaruma ita lakon enerjia sedu antes jogu remata (liu-liu ekipa mane sira) maibe la buat ida.” dehan maun Jorge. Enkuantu Kapitaun Ekipa feto mana Mize espresa Ekipa jogadores feto antusiasmu ho torneu Fongtil Cup ida nee, maske laos ema hotu bele joga ho diak, maibe fiar an no sólido mak sai razaun atu hola parte iha torneu refere. Kontenti hola parte iha jogus ida ne’ebe nakonu ho amizade entre jogadores feto sira

Ikus liu, jogador Zeka Nunes mos hateten katak torneu ne’e nu’udar dalan ida hodi hametin relasaun ho membru ONG sira seluk no promove moris saudavel, no haforte ekipa entre staff OiTL rasik. Entaun, hatama golu ida ne’e, hanesan BONUS ida! **Avansa ekipa Oxfam iha Timor-Leste :)**





Kalendáriu Eventu Tentativu

Jullu-Dezembu 2023

- Monitoring no reflesaun ho parseiru kada fulan 3 - Parseiru hotu projetu Feto no Rai - Jullu
- Lansamentu no Apresentasaun resultadu peskiza Lakon no Estragus nia impaktu ba direitu ba rai - Parseiru hotu projetu Feto no Rai - Agustu
- Workshop kona-ba Planu estratejiku Rede ba Rai - Agustu
- Treinamentu kona-ba Lei rai (rejime espesial kona-ba titularidade soin imoveis) ba parseiru no membru Rede ba Rai - Setembru
- Treinamentu kona-ba Estrategia no Advokasia, Parseiru hotu Projetu Feto no Rai - Setembru
- GOLD STANDARD audit ba Programa Rai Matak iha Liquisa, Covalima no Baucau - HMI, NETIL, CCC no Timor-Verde - Jullu
- Treinamentu Tree02 training ba parseru Rai Matak sira hotu, Organiza hosi HMI - Agustu
- Kontinua Treinamentu Tree02 no tree tagging ba parseru hotu - Setembru
- Atividade ROMANSA iha Baucau, Lautem, Likisa no Covalima ba Programa Rai Matak - HMI, NETIL, Timor-Verde no CCC - Setembru
- Treinamentu GALS ba Parseiru no comunidade hosi Covalima, Atauro no Likisa - Setembru
- Workshop Reflesaun projetu no parseiru kada fulan 6, Programa Feto no Rai - Outubru
- Seminar Nasional kona-ba estudo kazu ba Projetu Finansiamentu Klimatika - CGT, APFTL, Outubru
- Treinamentu DRR iha Dili no Oecusse ba parseiru hotu, RHTO - Outubru
- Treinamentu Community Based Disaster Ready Management (CBDRM) ba parseiru hotu Projetu DRP nia - Novembru
- Audensia ho Governante sira hodi apresenta resultadu peskiza, Relatoriu Cedaw hodi introdus programa direitu ba rai no feto no rai ba iha Governantes foun - Novembru
- Pagamentu To'os nain Programa Rai Matak iha Likisa, Baucau no Covalima - NETIL, Timor-Verde no CCC - Outubru
- Lansamentu Relatoriu Servisu tau matan la hetan selu (Unpaid Care work) hosi programa Hakbi'it - Outubru
- Lansamentu Fundasaun Rai Matak - Novembru
- Reflesaun Anual programa Rai Matak - Novembru

Akrónimu

AHP : Australian Humanitarian Partnership

CEDAW: Committee on the Elimination of Discrimination against Women

CRPD : Convention on the Rights of Persons with Disabilities

CBRN-TL : Community Based Rehabilitation Network Timor Leste

DRP : Disaster READY Program

DFAT : Department of Foreign Affairs and Trade

EhD : Ema ho Defisiensi

EU : European Union

FONGTIL : Forum ONG Timor-Leste

GALS : Gender Action Learning System

GfD : Governance for Development

HMI : Ho Musan ida

KSI : Kdadalak Sulimutuk Institute (KSI)

MFAT : Ministry of Foreign Affairs and Trade

NETIL : Nova Esperanca Timor-Leste

OiTL : Oxfam in Timor-Leste/Oxfam iha Timor-Leste

OTB : Open the Books

OSS : Organizasaun Sociedade Sivil

RAEOA : Rejiaun Administrativa Espesial Oe-Cusse Ambeno

RbR : Rede ba Rai

RHTO : Ra'es Hadomi Timor-Oan

SRA : Sentru Rekursu & Advokasia

ZEESM : Zonas Especiais de Economia Social de Mercado de Timor-Leste

SUPORTA HOSI:





OXFAM

Oxfam iha Timor-Leste
Avenida Hudi-Laran
Dili, Timor-Leste
+670 3312605